

KANIEN'KEHÁ:KA

Wentiiostha Nelson

Tsi iaa:onwe tsi nónwa nónwe ní:ien's, wentá:on' é:so ne wa'tierí'wakéhnha, tánon wahentó:ren'ne aieweientéhta'ne nahò:ten akwah tiorihowá:nen né: waakohshnié:non ónhka nón:wa ne akaónha.

Kanakerahserá:kon waontehiá:ron, í:ienres tsi ní:ioht tóka' sénha í:si' nón:we niieia'tó:ten tsi ní:ioht ne akohrénsion né: tsi iako'tá:raien tánon iah tha'teiakotekwenhsaié:ston. Waontehiá:ron tsi nihotirihó:ten ne kanakerahserá:kon, ahonwatikén:ron ne tehonatiéston, tóka' ní' iah tehoti'tá:raien káron kí' tsi Ratinien'kehá:ka. Tsi iáwe tehnitsá:ron Kanien'kehá:ka ne ontatien:'a ionnonhtón:nions kí' né:ne thonátte tsi Kanien'kehá:ka iakotená'tónhkwen. Iah teiakonónhses tsi tiakotehiá:ron iah teiakoweientehtá:on nahò:ten ionkhihró:ri ne ontionkwe'taókon ronatohétston. Ó:ia'k se's ionkhihró:ris rontáen:naras tánon enwá:ton eniesataenáhrho, tánon ne khok aó:wen aontahsehtáhkwe ne ionterennaientáhkwa. Iah teionttokáhskwe tsi nihonwatikarewátha otiá'ke áse' ken iakentiohkowá:nen tho nihatiiérhahkwe. Waénhre tho kí' nikarihó:ten tánon tho kí' wáhi ní:ioht tsi

waontehiá:ron. Kháre' ki ónen 20 sha'teikaohseriiá:kon wahonwanón:we'ne ne nithoión:'a tánon ronónhses, kwah akwékon wa'tewatté:ni, iah nonwén:ton teiakononhtonniónhon tsi neniá:wen'ne.

Iah óksa'k tho teiakorihó'tén:nen iá:ien ne kanonhsésne. Iakóhterons tóka' tó:ske ne tho iekonnétha kontaén:nara's. Tánon tóka' iah thakonthóntate akonwanatia'tahrhá:se, ionaterién:tare tsi iah teiakonónhses. Iononhtón:nions iah tho tetiakó:nakte. Tho ki' ní:ioht tsi ionnonhtón:nions iah tho tetiakó:nakte. Iah nonwén:ton teiakoteweiénston ne tsi niionkwarihó:ten, iah teierihwaienté:ri oh ní:ioht tsi aiontoria'neron ne' tho. Orihwí:io iakón:niskwe tsi tentiontatiá'tinekénhwe tánon enthatihnhohaién:te. Sénha tsi waontathró:ri iah thaón:ton skátne ahiá:tien ne akóhskare. Ákte ná'tehóntiens ne ronnon:kwe tánon konnón:kwe ne entewanónhton oh nesen'taró:ten. Kwah í:ken tsi iakotsheiaróntahkwe waénhre ontié:ren'k teniakó'nikonhrhá:ren ne ako'nikón:ra nek tsi iaontaweia'te.

Shontontié:renhte iaá:en tsi ná'teiontenonhwerá:tons waakotó:kenhse tsi sewatierenhkó:wa tsi ietshanískwe. Ki konnón:kwe ne kanonhsesne wa'tiontatenón:weron tánon tiotirihwaié:ri. Waakotiié:nawa'se tsi iah thénon teierihwaienté:ri, tánon wa'tiakotirihwa'serákwa'se nahò:ten waeri'wanontón:nion. Iah ní' ó:ni ónhka tha'teiakotkónston!

Nahò:ten wahentó:ren'ne ki tehontenonhwerá:tons akwé:kon Kanien'ké:ha tsi ronterihwahtentiá:tha, ronhá:tien tsi iontatién:'a tetsá:ron iatá:tiskwe ne Kanien'ké:ha tánon ne akohwà:tsire kwah tókenen tsi ronhró:kha, iah ki' nonwén:ton teiontaterihonnién:ni tsi ki' ní:ioht ne ronatia'ke ne sha'tethotí:ions. Ne ionkhiiookón:'a tánon

iakhihsothó:kon ahatharáhkwe nahò:ten iah tehónnehre aionkwathón:te'ne. Tho kí' ní:ioht tsi waontehiá:ron né:ne ronwatina'tónhkhwa iah tehotiwennake'tó:tha tsi rontá:tis, ó:tiá'ke ne ronathónte'skwe tsi tahontehiá:ron rotí'nikonhraién:ta's ohstón:'a é:so kí' tíó:to'kte ne iahatiwennaié:rike. Iontéhenskwe tsi tho ní:ioht waénhre aiá:wens tóhsa ahónttoke ne kanonhsésne.

Kí tsi ieiéntha wa'tiakoté:ni. Ronhá:tien tsi iah akwé:kon teiako'nikonhraién:ta nahò:ten rotihtharahkwen, karenna'shón:'a tánon ne kanón:nia tánon ka'shatsté-nhsera ne kanónhskon ne taiako'nikonhratihéntho. Tohkara'k niiohserá:ke ontohétste sok waon'ttoke tsi tontáhsawen waako'nikonhraién:ta'ne nahò:ten rón-ton, tánon tsi tehotihthá:ron sénha ó:nen waón'ronke tsi ní:ioht ne shontontié:renhte iaontá:weiá'te ne tóhka niiohserá:ke tsi náhe. Tontáhsawen waako'nikonhraién:ta'ne tsi niiohskats tánon ion'wé:sen aiakothón:te'ne ne onkwawén:na, ó:nen kí' taiontáhsawen iako'nikonhrá:reks ne aionteweiénste tekeníhaton akowen:na aiontá:ti.

Kwah tsik nón:we waakote'shennaién:ta'ne aionteweiénste tho kí' niaá:en ó:nen ní' tontáhsawen sénha aiako'nikonhraién:ta'ne tsi niioié:ren ne Residential tánon ne Indian Day School tánon tsi nihotiiá'tawén:en ne ieshonwatiiookón:'a. Waewientehta'ne ní' ó:ni oh nontié:ren tsi rotiianerensherón:ni ne Indian Act, tsi ne kahsaáhton ne tashakotité:ni akwé:kon ne Onkwehón:we.

Ne Indian Act wahétken tsi ná'ká:iere oh naiawén'ne sha'taontaiakó:tate ne ákte nithoné:non. Kwah kakó:ra ioianerensherón:ni ónhka enhonwatihá:ra'se áhontste ne tsi niionkwarihó:ten tánon tahontenonhwerá:ton,

enwá:ton ki' enhonwatií:na. Niá:wen tsi ótia'ke ne iethihsothokón:'a roti'nikonhrahni:ron tánon iah tehotitshahni:kon, ne nón:wa aorí:wa wahontahsehtá:nion tóhsa ahontehnhó:ton. Tho nontáwehte tsi waako'nikonhraién:ta'ne oh nontí:ren tsi wahonwennenhase rontaén:naras. Ne tsi ne Kakoráhsera iah teiakoianerenhserá:wi tahontenonhwerá:ton tánon ionterennaientákhwa ontsnié:non ia'taionkhi:ieste ne ratihnará:ken, ó:nen ki' waon'tkátho oh nontí:ren ne kenh nonkwá:ti ronatenatón:ni ronanonhtonniónhon tehontkónstha.

Ne ontatién:'a iah tiehoné:non ne residential school tsi ní:ioht ne ronatia'ke sénha thonnonkwe'tá:ions, online niaá:en aiakotó:kenhse tsi niwahétken tsi nihotií:ren. Nahé:'a ónwa'k ónen waonthró:ri ne ontate'nisté-nha tsi niakoiatawénhseron ne Indian Day School. Waakoto:kenhse tsi aiontéhen tsi iontathrewáhton tsi iontá:tiskwe ne akowén:na tánon oiáshon nahò:ten ne iah teioiá:nere. Tsi naho'ténshon waakotó:kenhse ónen ki' sénha waako'nikonhraién:ta'ne oh nontí:ren tsi iah thashewenná:ronke tsi rontá:tis. Rotihterón:on' tsi nihotiiatawénhseron iah tehoné:ron tho ninen'né:'e nahotiiá:tawen ne ieshonwatiiookón:'a tóka ní' ken kwah ronwati'nikonhrá:rio ne ahoti'nikonhratshahnihton ahonwennohétsten ne ronwatiiookón:'a ne raotiwén:na.

Iaontahsón:teren waonté:weienste tsi niionkwarihó:ten tánon taiontenonhwerá:ton. Tánon sénha waeri'wisákhon tsi niwahétken tsi niioié:ren ne kakoráhsera tánon tsi ní:ioht tsi ioianerenhserón:ni ne Indian Act. Sénha waonteweienste kí: teiorí:wake ó:nen ki' sénha waako'nikonhraién:ta'ne, nahò:ten iakawé:ron tsi

ní:ioht tsi aiontoriá:neron ne se' ne kén:en tsi ní:ioht tsi ronwaticarewáhton. Tsi iáwe iah teiontá:tis ne akowén:na ontatién:'a e'tho ní:ioht tsi ronohétston né tsi ronwaticarewáhton tánon ronwanatehá:ton ahontá:ti raotiwen:na ne tsi ionterihwaienstáhhkwa. Tsi ní:kon ienekwénhsare tsi iakokwehón:we né:ne Indian Act tiotáhsawen. Indian Act ensahró:ri tó: nihsokwehón:we, ok ne iethihsokokon'kénhen iah nonwén:ton tó nikon senekwénhsare ohén:ton tehonnohetstháhkwe.

Taiontáhsawen aiontkátho tsi ionkwarihowá:nen tsi kanakerahserá:kon tewén:teron ne tsi ioianeráhton ne kakoráhsara aiakó'teron ne ratihnará:ken. Ken'k ní:wa tsi nón:we enionkwará:kwen, enká:tate ken' niiorihwá:'a oh naiá:wen'ne tóhsa ákte' niaé:tewe. Ne Indian Act tsi ní:ioht tsi káhsón tóka' í:si' nón:we nentewateweiénste iah kí' Onkwehón:we tetsisatená'tónhkwen, akwé:kon ensá:ti nahò:ten saianerenhserá:ien ne kaienawá'séhtshera ne Indian Act tewatkáwas. Tethonaktá:ton tsi nihatiierhahkwe, ok ó:nen shiionkwaren'há:on' tsi niioierá:nion tánon ieionkwatahsón:tere né tewáhsere. Tánon orihwí:io wahonnón:ni tsi ne tentewatká:neren nahò:ten enthóntka'we tetewatáhsawen wetewaié:na tewatathró:ris tsi ioiá:nere se' ne onkwarihwá:ke sok tetewáhnhe "nahò:ten ionkwaianerenhserá:ien." Tsi waeweientéhta'ne tsi niionkwarihó:ten wa'tiakoron'wéksi tsi se' ronnéhre ne tethotinientariíá:kon taionkhite:ni. Thóne taiontáhsawen ne tóhsa ne taonsaiontká:neren nahò:ten tewatká:was ne kakoráhsara. Ónen iakoterién:tare ne ontionkwé:ta tsi ratiénthoskó:wa kén:nen tánon í:i ionkwatatorahstón:nen óhenton shahón:newe ne tethotinientariíá:kon. Iah ní' ó:ni skatíhne tetierihwarákhwa ahonwanatia'tón:ti ne ontionkwé:ta,

aetewanonhtón:nionhwe kanakerahserá:kon ratí:teron
sénha í:si' nón:we nihatiia'tó:ten.

Taiontáhsawen waontkátho tsi niiorihó:ten ne
skatí:ne ahonwataré:wahte ne kanakerahserá:kon,
é:ren waehá:wihte tsi ní:ioht tsi iakotoriahnerón:nen
ne taierá:ko ne ka'nikonhri:io aiéhsere (good mind).
Ontié:sen'ne kí:ken tsi sénha waonteweiénste ne tsi
niiokwarihó:ten tánon tsi niaawénhseron ákte' ne
Indian Act. Nia'tewenhiserá:ke tsi ne waerá:ko ne sénha
aiakotonkwe'takwarí:shion. Aontaiakorihwaiéri:hake,
aiethí:reke ne ónkwe taonsahón:nehkwe ne tsi
niionkwarihó:ten tánon ne raotiwén:na. Tóhsa ó:nen
aonsaiethí'nién:tho tsi ionkwáthare ehtà:ke niaiethí:hawe
ónkwe ne tehonatenhontsó:ni ahonteweiénste ne rao-
tiwén:na tánon tsi niionkwarihó:ten.

Kí tsi naé:iere waé'tshén:ri tsi tekení:neren ne akowé-
n:na tánon tsi niionkwarihó:ten, tontáhsawen ó:ia' ní:ioht
tsi saionnonhtonniónhwe tánon tsi ní:ioht tsi aiakónhn-
hetie. Tsi ía:we teiakotenhontsó:ni aiontiá:taren ne sénha
aioiá:neren'ne ne akonakerahserá:kon, aiethiié:nawa'se,
aiethí'nikonhrá:reke, skén:non akénhake tóhsa ónhka
taiontatiá'tó:rehte, aionská:neke sénha aioianeréhake,
tsi ní:ioht ne tethotinientariiá:kon taionkhité:ni. Tánon
aetewathroriá:nion tsi tsik se' ónhka eniekwé:ni kí:ken
iah thénon tewatsteristha tó: nitiótte tsi ienekwénhsare,
tóka ní' ka'nón:we naié'terón:take.

Tsi nia'tewenhiserá:ke teshonkwá:wi tho kí'
nikahá:wi ionkwate'shén:naien aetewará:ko oh nient-
sitewá:iere tánon entewahkwís:ron ne tewaiá'taktón:tie.
Entewakwé:ni ientewatahsón:teren entewathahí:ta ne
wahón:nise tkahahí:son tánon watié:sen tho aiontó:hetste

ne tsi wahón:nise shiiohá:te tánon tsik ónhka ne ion-
thahí:taahs. Tóka' ní' tho nentewá:iere tsi ní:ioht ne
akaónha. Ne aetewará:ko niá'tewenhiserá:ke sénha
aioiá:neren'ne tánon sénha aetewarihwaiénté:ri tsi
ní:ioht ne thetenré:ne. Ne aetewará:ko ne aontaionkwar-
ihwaierihake tsi ní:ioht ne aiethikaré:wahte. Ahserá:ko tsi
niiawénhseron ahsateweienste, tsi niionkwarihó:ten tánon
onkwawén:na. Tierákwashá'tahóntste akohrénshon
nahò:ten iakoterién:tare, aiakó:hetste, aiontatatohétsten
ken'nakatsí:rahske nahò:ten iakoterién:tare aiontá:ton
ne tseiá:ta.

Aonkate'shennaién:take ne akerá:ko ne í:i akén:hake
ne akaón:ha.